

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2994 del 16/10/2023

Traduzione in ladino

Se à serà su l Festival de la Joentù del Euregio a San Martin de Tor

Binèr adum i joegn del Euregio, na ocajon per lurèr fora e rejonèr dessema dintornvia argomenc de autalità e meter a jir discusions: chisc l é i fins del Festival de la Joentù che l é stat endrezà te Badia

Co na discusion dintornvia l davegnir del Euregio Tirol-Sudtirolo-Trentin e la scontrèda col assessor per la Formazion e la Cultura ladina tel Istitut Cultural Ladin Micurà de Rù a San Martin de Tor se à serà su l Festival di Joegn del Euregio 2023. Endèna la scontrèda col assessor i joegn i à portà dant sie pensier col definir l event n moment da gaissa e na bona ocajon per fèr amicizies sorafora la seides e passèr via la dificoltes linguistiches. L Festival de la Joentù del Euregio 2023 l é scomenzà en mercol ai 4 de otober tel Istitut Ladin Micurà de Rù a San Martin de Tor olache l diretor Jürgen Runggaldier l à portà dant sia atività.

Al luster l plurilinguism, la cultura e l turism

I argomenc prinzipèi de la doudejeijema edizion del festival de chest an i é stac l plurilinguism, la cultura e l turism. 36 studenc anter i 16 e i 19 egn che i fèsc pèrt di trei raions del Euregio Tirol-Sudtirolo-Trentin, te chisc cater dis de festival te Badia i à abù l met de se fèr n pensier dintornvia l lengaz, la cultura e la storia de la jent ladina. N moment spezièl, per chi che à tout pèrt, l é stat l cors intensiv de ladin.

Ti dis do l é stat endrezà workshop con artis te Museo ladin "Ciastel de Tor" che i joegn à podù veder, compagné da la diretora Katharina Moling, e ence momenc de discusion con Dennis Dorigo, diretor del Istitut culturèl ladin "Cesa De Jan", dintornvia la spartijon de la Ladinia stata acà i cent egn.

Vijites a musees e scontrèdes con jent del mond del sport

Endèna i cater dis del Festival de la Joentù l é stat ence endrezà na vijita compagnèda al Museo de la Gran Vera "Tre Sassi" sun Jouf Valparola e al Museo defora sul spiz de Lagació. No l é stat demò rejonà de lengaz e cultura ma bensegur ence de turism: endèna l moment "Evenc sportives e turism te Badia" i joegn e la joenes i à podù scontrèr persones de nonzech del mond del sport e del turism, e i à abù ence ocajon de "curiosèr" daite del hotel La Villa.

L Festival del Euregio l à garatà

Da acà 12 egn l Festival del Euregio bina adum joegn anter i 16 e i 19 egn che vegn dai trei raions del Euregio col mot "Fèr su adum l Euregio". Tel 2014 l Festival de la Joentù l à ciapà da l'Union Europeèna l pest GECT "Building Europe Across Borders ", per l secondo post.

Traduzion di Servijes Linguistics e Culturèi del Comun general de Fascia

(cdt)